

Paur kute Ximoximã atãri pi'ôk no'ôk ne ja.

Paur ne ajte Ximoximã pi'ôk no'ôk ne. Krĩraxbê Rômakam ne me Paurbê ijê nhym mekbê ijê djâkam dja. Nãm amijamãro dja. Me kute bĩnmã amijamãro dja. Ne kam krabê Ximoximã pi'ôk no'ôk ne. Jejukôt ne Paur Ximoxio kra. Nhym Ximoxi krĩraxbê Epexukam djan memã Metĩndjwỳnh kabẽn'ã ujarẽnho dja. Nhym Paur mete bĩn kutã kum pi'ôk no'ôk ne kum,

—Arỳm ityk 'ỳr. Arỳm ne ba amijo rãm ne ja. Gop arek memã Metĩndjwỳnh kabẽno amirĩto aku'ê. Ba ije amã arẽnhja dja ga amũ idjô'ã memã arê. Gora atỳx ne, ane. Ne ajte kum,

—Amrê Rôma'ỳr tẽn ipumũ, ane. Nãm ã Paur Ximoximã ane. Paur kute kum tỳx jadjâr nhym Ximoxi tỳx ne katât kute memã Metĩndjwỳnh'ã ujarẽn ne kute memã Metĩndjwỳnh kabẽn jarẽnhmã. Nhym me 'êx ne kute amijo Jeju nhõ me jao ba djwỳnhja ne me Metĩndjwỳnh kabẽn kupa'ã ar memã arẽnho ba. Nhym bep Ximoxi gêdja katât memã arê. Kadjy ne Paur kum pi'ôk no'ôk ne ano.

¹⁻² Akmere Ximoxi, ba ibê Paur ne ba amã pi'ôk no'ôk ne. Imã akĩ:nhkumrêx, akmere, ba kam ajo ikra. Ba ibê Paur, ibê Jeju Kritu nhõ àpênh ne ba amã pi'ôk no'ôk ne. Metĩndjwỳnh ta ne imã arẽn ijano, ije memã arẽnhmã ijano. Metĩndjwỳnh ne arỳm me bamã kabẽn pydjĩn arê, me baje arỳm amim Kritu Jeju markumrêxkam ne kute me bajo tĩnmã me bamã kabẽn pydjĩn arê, gu me batĩn rã'ã rã'ãmã. Ba kam ô'ã memã arẽnho tẽ.

Gê Metĩndjwỳnh ajo djuw mex. Kritu Jeju gu banhõ Bẽnjadjwỳrmẽ Bãmbê Metĩndjwỳnh ar ukaprikõt ajo djuw mex ne ar ajo ba. Gê arkum akapri ne amã umar mex jarẽ, ga kam adjumar mex ne ar aba.

³ Ë, nã bãm aman kam mã Metĩndjwỳnhmã amikĩnh jarẽ. Metĩndjwỳnh ta, kumã ne ba amikĩnh jarẽn kum ajarẽ. Kumã ne ba idjãpênh. Ije amikam ijaxwe 'õ mar kêt ne kum idjãpênh iba. Me bakukãmãre ne ã Metĩndjwỳnhmã ãpênh ar bao ane ba kam badjwỳ ã kum idjãpênh ar ibao ane.

⁴ Abenbê gu babikjêr kutã amỳrkam ije amar rã'ã. Akamãtkammẽ a'urimẽ ba aman kam te ije apumũnh prãme. Dja ba apumũn kam arỳm ikĩnhkumrêx ne. ⁵ Ba ije prĩne amar. Ga ne ga aje akabẽno aben nhikjê kêt ne tu amim Jeju markumrêx ba arỳm ama. Akwatynh Roxdjimẽ anã Juniximẽ ne ar ã akajmãtã amim Jeju kamnhĩxo ane. Ga kam gadjwỳ ar kôpdji'ã tu amikajmã'ã Jeju markumrêx. Ba kam arỳm amã ikator mex ne.

Tu kum me uma kêt mã 'ã karõ.

⁶ Kam ne ba ije amã ikabên jarênhmã. Aje amimar kadjy ne ba akubyn amã arẽ. Ë, ije ajã aminhikra djirkam Metĩndjwỳnh kute amã mỳjja rerja dja ga tu markumrêx ne ar o aban on ajte atỳx ne kum adjãpênh tỳx ne. Tu amã me uma kêt ne memã Jeju jarẽ. ⁷ Djãm me batĩn prãm ne ar babamã got Metĩndjwỳnh me bawỳr ta Karõ jano. Arkati, me batỳx ne ar baban bamã aben jabên baje amipnênh ne ar babamã. Nãm ã Metĩndjwỳnh Karõ me bajo ane.

⁸ Kam dja ga apijãm kêt ne tu memã Jeju'ã ajarẽn ajte badjwỳ ikam apijãm kêt ne. Nã bãm Kritu'ã idjujarênh ny jarênhõ tẽ nhym me mekbê ijê djãkam imẽ. Kam dja ga ikam apijãm kêt ne. Nhym bep kati, dja ga tu atỳx ne memã Jeju'ã ajarẽ nhym me kum Jeju kurêkam kôt kum

akurên akam ngryk ne ajo ajkê ga kam ikudjwa atokry. Kwãrîk wãnh rá'ã Metĩndjwýnh dja on amã týx jadjà, atokry katikôt amã týx jadjà ga kam atýx ne ar aba.

⁹ Nã, Metĩndjwýnh ta, kute me bapytãr djwýnh dja amã týx jadjà. Nãm me bapytãn amiwýr me bajuw, me bamextire ne ar baba kadjy ne amiwýr me bajuw. Mã ne gu me nê nhym Metĩndjwýnh kôt me bapytã? Djãm me bamex ne ar babakôt ne me bapytã? Arkati, ta ne tu me bajã amim karõ, ukapríkôt ne tu me bajã amim karõn kam amiwýr me bajuwn me bapytã. Me baje tu amim Kritu Jeju markumrëxkam me bapytã. Amrêbê:, kute pyka nhipêx kêtri ne Metĩndjwýnh ukapríkôt me bajã amim karõ, Jeju Kritu kute me bapytãrmã ne amim me bajã karõ. ¹⁰ Amrêbê ne me bajã amim karõn kam ajbir me bamã o amirít. Kritu Jeju, me bapytãr djwýnh arým me bawýr tẽn bõx ne me bamã Metĩndjwýnh djukaprõ amirít. Arým ne bõx ne me bamã me batyko apêx gu me tu batĩnkumrëx, me batyk nhijukri batĩn rá'ã:n amũ ijukri batyk kêtkumrëx ne. Be, Metĩndjwýnh ukaprĩa pumũ. Nhym me Jeju'ã gwaj badjujarênh nykôt arým kuma.

¹¹ Kam ne Metĩndjwýnh ijano. Kum idjãpênh ne me kunĩmã kãj bê Jeju'ã idjujarênhmã ijano ba tẽn. Ije me kunĩmã kukrãdjã ny jarênh nhym me kute marmã. Kadjy ne ijano ba tẽn. ¹² Nã bãm tẽn memã arẽ nhym me kam ijo ajkê. Jeju'ã idjujarênhkôt ijo ajkê ba itokry. Djã nã bãm kam ipijãm? Arkati, arým ne ba tu amim Jeju kamnhĩxkumrëx ne kam arým prĩne amim àtãri. Gêdja prĩne ije Jejumã amikangakam prĩne ijo djuw mex ne ijãno dja. Ne ijãno ãm rá'ã: nhym õ akati arým 'ýr bõx nhym akubyn me bawýr bõx. Tãm ne ba mar týx ne amijã kamnhĩx ne.

¹³ Gora ije amã katãt ikabên jarênhja amijamakkrekam anhôn 'ãno djan ikõpdji'ã kôt ar amijo aba. Ne aje arým

amikajmã'ã Kritu Jeju marja 'ãno djan kôt tu amã me kunĩ jabê ne. ¹⁴ Ë, Metĩndjwýnh kute katàt memã kabên jarênhja ga aje kôt ar amijo abaja gora mã kôt ar amijo aba rã'ã. NhyM Metĩndjwýnh Karõ kute me bakam krĩja dja ajo tỳx ga kam kôt ar amijo aba.

¹⁵ Pykabê Adjikkam me kunĩ ne me ikangan mõi, me umaje mõi ga arỳm ama. NhyM Pijerumẽ Emodjedjwỳ mekôt ikanga.

¹⁶ NhyM bep ate ne Nexipõr. Tãm ne imã kĩnh jadjàr mexkumrẽx. Ne ajte imã kĩnh jadjà. Nãm imã kĩnh jangjênh krãptĩ ne. Me kute ibê ijêkam pijàm kêt ne. Kum me uma kêt ne. Gê pãnh Bẽnjadjwỳr Jeju kum kaprĩ. Kum Nexipõrmẽ õbikwa kunĩ ar kaprĩ. ¹⁷ Nãm krĩraxbê Rõmakam ajbir bõx ne prĩ:ne ijabej. Ijabej tẽn ijabej tẽn ijabej tẽn kam imã kato. ¹⁸ Amrêbê krĩraxbê Epexukamdjwỳ ikôt àpênhja ga arỳm aje mar mex. Nãm apỳnh mỳjja kupên o ikôt kangõ. Gê Bẽnjadjwỳr Jeju kum kaprĩ, Bẽnjadjwỳr akubyn bõxkam kum kaprĩ. Tãm ne ja.

2

Ãm tỳx ne rerek kêt mã kute arênh.

¹ Be, akmere Ximoxi, gora atỳx. Kritu Jeju ta ukaprĩkôt dja ajo djuw mex ne ajo tỳx ga kam atỳx ne ar aba. ² Ë, gop ikabên ma. Ba ije me ipõkri memã ikabên jarênh nhyM me krãptĩ kute mar ga gadjwỳ aje marja tãm dja ga amidjõ'ã me kwýmã arê. Me mrãmri kabênkumrẽxmã dja ga arê. Me kute amim Jeju mar 'ãno ãmmãbit dja ga arê nhyM kam me akõpdji'ã amũ aben nhijuk'ã memã arêho tẽ.

³ Ë, me krãkamngõnhreja pumũn me'ã amijakre. Dja ga abê krãkamngõnh prãbê te atokryn mã Kritu Jejukôt ajkamẽ. ⁴ Ë, me krãkamngõnhre ba kutã kute amijangri tỳx ne kute tu mỳjja mar kêt ne mũm mrãnhbit kute marja pumũ. Jabit ne me kute mar ne ba. Me kute atemã mỳjja

kajgo mar kêt ne tu ba, me õ bẽnjadwÿr kute memã kabên mex jarênh ne mekam kînh kadjy. Gadjwÿ dja ga ã amijo anhÿr ar o aban anhõ Bẽnjadwÿr Jeju Kritu kabênkôt amrãnhbit aje mar nhym kôt kute apumũnh ne akam kînh kadjy.

⁵ Ë, dja ga me kute aben rerdjwÿ pumũn me'ã amijakre. Gadjwÿ dja ga ã anen Kritu Jeju kukràdjãkôtbit ar amijo aba. Me kute aben rerkam dja me mrãnh tÿx'õ pydjìn me bakukràdjã tũmkôt me kure. Nhym kam me kumãbit kînh djã ngã. Be, gadjwÿ dja ga ã anen Kritu Jeju kukràdjãkôtbit ar amijo aban kam kàjkwamã 'ÿr bõx.

⁶ Ë, dja ga ajte me õ pur djwÿnh kam àpênh rax pumũn me'ã amijakre. Nãm me õ pur djwÿnh amim pur jadjuwn arÿm kam djwÿ kre nhym arÿm abatành ne. Nhym me õ pur djwÿnh kumrêx kam djwÿ krên arÿm kînh ne. Dja ga 'ã amijakren adjãpênh rax ne. Nhym kam Metĩndjwÿnh amã o pãnh ne. ⁷ Ë, dja ga ikabênja mar ar o aba. Nhym kam tũmrãm dja Bẽnjadwÿr djwÿnh arÿm ano bõ ga kam arÿm mÿjja kunĩ ma.

⁸ Ë, Jeju Kritu dja ga omũ. Bẽnjadwÿr raxbê Dawi tãmdjwÿ 'õ. Ga tyk ne akubyn tĩn ne katorja pumũ. Kukràdjã ny'ã ne ba ar idjujarênh ibaja, ⁹ Jeju kukràdjã ny'ã ar idjujarênh ibakôt ne me kum ikurên ijo ajkê ba itokry ga me kute idjuwpreja pumũ. Nãm me ijo ijaxwen idjuwpre ba nõ. Ë, djã nãm me idjuwpren o mebê Metĩndjwÿnh kabênbê aptã? Kati, dja me 'ã ujarênh tẽm rã'ã ne amũ abendjõ'ã pyka kunĩkôt abenmã arẽ. ¹⁰ Kam ne ba te itokryn Metĩndjwÿnh 'ãno djan tu ate ikrã. Mÿj kadjy? Bir, Metĩndjwÿnh nhõ me ja kadjy, Metĩndjwÿnh kute amijo me utãrja kadjy. Me jadjwÿ Kritu Jeju kute me utàr nhym me kôt õ kàjkwa mextirekam ar ba rã'ã: rã'ãmã. Õ kàjkwa mextire, kam mÿjja punu kêt, pĩne

mexo kute pykabê mÿjja ja jakrenh, õ kàjkwa mextire jakam me ar ba rã'ã rã'ãmã. Kam ne ba te itokryja. Me jadjwÿ kute amim Jeju mar nhym kute me utàrmã.

¹¹ Mrãmri ne me abenmã,

—Dja gu me Jejukôt batyk jabej kôt ajte batïn.

¹² —Dja me te me bajo ajkê gu me te batokryn mã Jeju 'ãno djan kam pãnh batyk nhijukri akubyn batïn ne babênjadjwÿr ne ar meo baba.

—Dja gu me amikatin jãm Jejubê bakrã nhym adjwÿnhdjwÿ me babê amikatin jãm me babê krã.

¹³ —Dja gu me amrêbê baje amijo Jeju pytàrkam me krãptïjakôt bajaxwe nhym kam Jeju dja me bamar rã'ã ne. Me ba dja gu me amibê kanga nhym bep ta gêdja me bamar rã'ã ne, me bakanga kêt ne. Mÿkam? Bir, ta ne kabênkumrêx. Kabên pydji ne me bakadjy arê. Gêdja atemã ajte amibê kabên 'õ jarênh kêt ne. Kam dja amibê me bakanga kêt ne.

Ë, mrãmri ne me ã abenmã kabênwã jarênh o ane.

Kute memã Metïndjwÿnh kabên jarênhmã.

¹⁴ Wãnh dja ga ajte akubyn memã tãm jarê gê me ajte kuma. Ne ajte memã kum,

—Ë, kwãrik wãnh me akabên kukràdjã mÿr jabej abenmã adjàkrê kêt ne akabêno aben japanh kêt, ane. Dja ga memã wã jarê, kàj bê memã akabên jarê. Metïndjwÿnh kute akabên mar ne akôt kabênkam memã akabên jarê gê me kuma. Djã nãm me ari abenã atom bakam mex got? Kati, nãm me mÿjja man nhÿnh kabên ja'õ mÿr jabej ajmãn ar abeno bikênh o ba.

¹⁵ Ë, gora Metïndjwÿnhmã adjàpênhkam atÿx. Prïne katàt Metïndjwÿnh kabên'ã memã adjujarênh ar aban

memã arẽ. Metĩndjwỳnh kabẽn ne katàt. Kam dja ga katàt memã 'ã ajarẽ. Metĩndjwỳnh akam kĩnh ne kute amã,

—Amexkumrẽx. Ba akam ikĩnhkumrẽx, anhỹr kadjy. Kadjy dja ga adjàpênhkam atỳx ne kam amikam apijàm kêt ne.

¹⁶ Kwãrĩk wãnh me kabẽn kajgo kwãrĩk wãnh nõ. Me kabẽno kute aben japanh kwãrĩk wãnh nõ. Rũm kum akàx. Wã, me kabẽn wão dja me Metĩndjwỳnhbê amiptàr mex ne. Kubê o amiptàro mõi o mõi o mõi ĩ kubê o amiptàr mex ne arỳm o amipunu mex ne. ¹⁷ Me kabẽn punu wã kute wajre pyràk. Ga wajre kute amũ me ĩ kuro baja pumũ. Nhym me ujarẽn punuja ã prĩne meo bikẽnho ane. Me ja 'õ nhidjibê ne Imene. 'Õdjwỳ ne Pireto.

¹⁸ Nãm ar amibê Metĩndjwỳnh kabẽn kanga, Metĩndjwỳnh kute katàt memã kabẽn jarẽn ja kangan kabẽn punuo amũ Jeju nêje meo akẽxo tẽn memã kum,

—Arỳm apêx. Arỳm Metĩndjwỳnh kute akubyn meo tĩn djã arỳm apêx, ane. Nãm ã ar memã 'êxo anen me kwỳo ajkê, me kute amim Jeju mar kwỳo ajkê.

¹⁹ Nhym bep ate ne Metĩndjwỳnh kabẽn. Metĩndjwỳnh kabẽn ne mrãmri kabẽnkumrẽx. Kute kẽn pyràk, kẽn nhỹr tỳxja pyràk. Nãm me te kute kẽn nhikô 'yrmã. Nãm ã Metĩndjwỳnh kabẽndjwỳ ane nhym me te kute kabẽn nhikô'yrmã. Nhym Metĩndjwỳnh kabẽn ne memã kum,

—Bẽnjadjwỳr djwỳnh ne ta õ me ja prĩne arỳm me àtari ne prĩne arỳm mekam ama, ane. Ne ajte,

—Gora gê me kute “Ije Bẽnjadjwỳr Jeju mar” anhỹrja me on mỳjja punu kanga, ane. Nãm ã Metĩndjwỳnh kabẽn'ã pi'òk no'òk ane. Nhỹnh ne me'õ ne kute kabẽn nhikô'yrmã.

²⁰ Ë, me'õ bẽnjadjwỳr nhũrkwākam ne ngõnh apỳnh kute abeno djari kumex. Kwỳ ne adjênh nhym bep kwỳ ne

kajgo. Mexja ne kën karÿro ipêx ne kwÿ kryt jakao ipêx. Nhyim bep kajgoja ne ngôkraxmê ngyo ipêx. Tãm ne mÿjja kajgo kadjy. Nhyim bep mexja ne mÿjja mex kadjybit.

²¹ Nhyim me prÿne ngôn h ku'ô nhyim kam akan kam mexkumrêx, mÿjja mexkumrêx kadjybit ku'ê. Be, gu me badjwÿ ngôn h'ã amijakren prÿne amijaxwe, mÿjja punu kangan kam bamexkumrêx, mÿjja mex kadjybit bamextire. Nhyim kam me banhô Bënjadjwÿr dja arÿm amim me bapumjuw, kum me badjâpên h kadjybit amim me bapumjuw. Gu me kam apÿnh badjâpên h djari badjâpên ho baku'ê.

²² Nãm me abatàn h nyre kum mÿjja punu prãm kumrêx. Rũm kum akàx ne kubê amiptà. Gê arÿk wãn h me kute mÿjja punuo bawã arÿk wãn h memã nõ. Nhyim bep kati, ga dja ga katàt amrãn h'ã anopdji. Katàt amrãn h ne aje amim Jeju kamnhÿxbê ar aban amã me abên mekam angryk kêt ne adjumar mex ne ar aba, be, mÿjja ja dja ga 'ãno djan 'ã anopdji ne. Kam gêdja ga ã amijo anhÿro tẽ. Me jamê ro'ã ã amijo anhÿro tẽ. Me ôkre kadjwÿnhbê axwe'ô nõr kêt ne kute Metÿndjwÿnhmã amijo à'wÿrjamê ro'ã dja ga ã amijo anhÿr o tẽ. Nhyim arÿk wãn h mÿjja punuwã wãm nõ.

²³ Kwãrÿk wãn h me kute abenã atomwã kwãrÿk wãm nõ. Tãm ne kajgokumrêx. Tãm gêdja wãm nõ. Djãm kôt mete mÿjja mar got. Kôt ne me kum aben kurên kam aben japrÿn abenmã àkrê.

²⁴ Bep kati, ga abê Bënjadjwÿr djwÿnh nhô àpên h kam kwãrÿk wãn h akabêno me apan h kêt. Bënjadjwÿr nhô àpên h ne me me kunÿkam ukaprÿ ne prÿne memã Metÿndjwÿnh kabên h'ã ujarên h mex ne, ngryk kêt ne memã 'ã ajarê. Nãm ã Bënjadjwÿr nhô àpên h ã meo ane.

²⁵ Abê Bënjadjwÿr nhô àpên h kam dja ga ã o anen kam akràn mã akurê djwÿnhmã akabên ne tu kum akabên mex

jarẽ. Birãm Metĩndjwỳnh dja amikadjy me ja ngrẽk nhym me arỳm amikam ajkam aman wãnh axwemã iren 'ỳr amijo akẽx ne arỳm Metĩndjwỳnh kute katàt memã kabẽn ja arỳm kum kato. ²⁶ Arỳm Metĩndjwỳnh kute katàt memã kabẽn jarẽn ja man arỳm amim kato. Xatanaj ne me ja pa 'amỳn amiwỳr meo mõn ar meo ba nhym me kam ar kum àpẽn ba. Birãm Metĩndjwỳnh dja amikadjy akabẽno me ngrẽk nhym me arỳm amim katon Xatanaj kangan kubê amiptàn arỳm jãm Jejuo amijakre. Kadjy ne ba amã,
—Akràn mã memã akabẽn jarẽ, ane.

3

Pyka kute o ino rer 'ỳr me axwe raxmã kute arẽn. *Xim k 4.1; Djuda 18*

¹ Ë, prĩne ikabẽn ma. Adjỳm, dja ĩ me umar punu djà kato. Pyka kute o ino rer 'ỳrkam dja ĩ me umar punu djà kato. Mỳkam dja me umar punu? Bir, me axwe raxkam. Ije, mã ne me kukràdjà kute?

Je kum dja ĩ me apỳnh amijo ba. ² Dja me òdjỳn kam amidjwỳnhbit man memã mỳjja nhõr kêt kumrẽx. Dja me kum nêkrẽxmẽ pi'òk kaprĩbit prãm kumrẽx. Dja me amiraxbito amra. Dja me òkre kadjwỳnhbê amim,

—Ba ne ba imexmẽ iraxo me akrenh mex ne, ane. Dja me ar me ũno ba. Dja me nãmẽ bãm kabẽn mar kêt kumrẽx. Dja Metĩndjwỳnh kute memã mỳjja nhõrja kunĩ kubê kĩnh no kati. Dja me Metĩndjwỳnhbê amiptar mex ne.

³ Dja me kum aben kĩnh kêt kumrẽx. Dja me ukaprĩ kêt kumrẽx ne kum aben kurê kumrẽx. Dja me aben kà mex jarẽ. Dja me amipnên ar ba kêt ne tu arĩk ar ba. Dja me àkrê kumrẽx. Dja me kum mỳjja punubit kĩnh ne kam kum mỳjja mex kurê kumrẽx.

⁴ Dja me kurê djwÿnhmã õbikwa kanga. Dja me amakkre kêt. Dja me arík ta amijã bÿnjadjwÿr rÿnh ar o ba. Dja me amidjwÿnhbit o kÿnh ne kum Metÿndjwÿnh kÿnh kÿtkumrÿx. ⁵ Dja me 'êx ne mekõt Metÿndjwÿnhmã ngrero krÿ. Ajkwakambit ne kute Jeju mar. Nhyr bep kati, amikadjwÿnhbê kute amikam Jeju mar kêt ne kute uma mar kÿtkumrÿx. Ê, kwãrik wãnh me ja kõt amrãnh kêt ne rÿm memã akre rax.

⁶⁻⁷ Ê, me arík baja ne me kwÿ me nire'ÿr wangij ne atemã memã kabÿn jarÿ. Me nire ja ne me no kêt ne axwebit ma ne kum mÿjja punubit prãmkumrÿx ne arík mÿjja punu jabej mrã. Te kute mÿjja marmã ne Metÿndjwÿnh katãt kabÿnja mar kÿtkumrÿx. Be, me nire punu jamã ne me atemã kabÿn jarÿ nhyr me prÿne me kabÿn man kõt ar amijo ba.

⁸ Me ja, me kute Metÿndjwÿnh kupa'ã memã 'ã ujarÿnhja ne me kute mÿjja punubit mar. Djãm me kute amim Jeju mar got. Arkati, nãm me kum Metÿndjwÿnh katãt kabÿnja kurêkumrÿx ne kam me kute Mõjdjê kurê djwÿnh pyrãk. Me kute me bakukãmãrebê Mõjdjê kurê djwÿnh ja pyrãk. Ar idjibê ne Djanimÿ Djãmbri ar. Ar tãm ne ar kabÿno Mõjdjê japanho ba. Nhyr me kute Metÿndjwÿnh kupa'ã memã 'ã ujarÿnhjadjwÿ ã kabÿno Metÿndjwÿnh kabÿn katãtja japanho ane, ne Metÿndjwÿnh kabÿno mÿjja kajgo ar o ba.

⁹ Bep kati, dja me punuja amijo mrãnh 'ijabjê kêt nhyr me memã apõx, me axwemê me bibãnhmê me arík bajamã apõx. Me kute Djanimÿ Djãmbri arkum katorja pyrãk. Dja ã me memã apõxo ane nhyr me kunÿ me axwe kõt me omÿ.

Metÿndjwÿnh kabÿn jarÿnh'ã ukanga kÿtmã kute arÿnh.

¹⁰ Nhy m bep ga ne ga arým iman ikôt ar amijo aba. Ije memã Metĩndjwýnh kaběno amirĩt ne ije kôt ar amijo iba ne ije Metĩndjwýnho amiptàr kadjy idjãpěnh o ije amirĩt ga arým kôt prĩne ipumũn arým prĩne idjãtãri. Ije amikajmãtã Jeju mar ne 'ã ingrà tỳx ne akrãnmã ije meo iba ne imã me abê ne ije Jeju 'ãno idjãm ne ije kanga kêt ga arým kôt ipumũ. ¹¹ Me kute ijo bikěnh ga ga arým itokrykôt ipumũ. Krĩraxbê Āxikimě krĩrax 'õbê Ikônimě krĩrax 'õbê Rixamě kam me kute ijo bikěnhkôt ga arým ga ipumũ. Nãm me prĩne ijo ajkě ba itokry: ne. Nhy m bep Běnjadjwýr Jeju ne mỳjja kunĩbê ipytã.

¹² Bir be, mrãmri ne me kute Kritu Jejukôt amijo ban katãt mrãnh prãmja mrãmri dja me kãtãm arým me jao ajkě.

¹³ Ĕ, me axwemě me 'ěxnhĩmě gědja me ĩ punu raxo mõr purokam ĩ punu rax mex ne. Dja me memã 'ěx ne me noo akno nhy m me kam amipãnh me jamã 'ěx ne me noo biknor mex ne.

¹⁴ Nhy m bep ga. Ga dja ga mã kôt amijo aba. Ar ije amã Metĩndjwýnh kaběnh jarěnh ga arým ga prĩne aje amim mar dja ga arek 'ãno djan kôt ar amijo aba. Ar ba ar ije amã arěnhja ga arým ar ipumũ. ¹⁵ Aprĩrekam ga arým Metĩndjwýnh kaběnh maro tě. Maro těnh o atěm rã'ãn arým ajabatãnh ne arým prĩne ama. Metĩndjwýnh kaběnh mexkumrěx kute ano bõnh ga arým aje tu amikajmãtã Kritu Jeju markumrěx nhy m arým kute apytãrja tãm ne ga arým prĩne o těnh arým prĩne ama.

¹⁶ Be, Metĩndjwýnh ne me bakukãmãremã arě nhy m me kaběnh'ã pi'õk no'õk ne, kôt pi'õk no'õk ne. Pi'õk no'õkja kunĩ ne kubê me banhõ Metĩndjwýnh kaběnja. Mỳj kadjy ne Metĩndjwýnh kaběnja? Bir, kute katãt memã Metĩndjwýnh kukrãdjã jarěnh kadjy, kute me axwe něje me akre kadjy, kôt me kute amũ aminhijuk'ã amidjar

kadjy, kute katàt me krã pymjÿr nhym me kute katàt mrãnho amũ amikamẽnho mör kadjy. Be, kadjy ne Metĩndjwÿnh kabẽnja. ¹⁷ Nà, Metĩndjwÿnh ta kabẽno dja prĩne õ àpẽnho tÿx ne, prĩne o mex gẽ me kum apÿnh mÿjja mex djàribit kĩnh ne ar o ba. Be, dja ã Metĩndjwÿnh Kabẽno meo ane.

4

¹ Ë, Kritu Jeju dja akubyn me bawÿr bõx ne ar me bajo ba, umao ar me bajo ba. Dja bõx ne me kunĩ jaxwekam memã pãnh jarẽ, me tĩnmẽ me tykmẽ me axwekam memã pãnh jarẽ. Kam ne ba Jeju Kritu kabẽnkõt, Metĩndjwÿnh kabẽnkõt amã ikabẽn jarẽ. Ne amã,

—Ë, gora memã Metĩndjwÿnh kabẽn jarẽ. ² Gora prĩne memã Metĩndjwÿnh kabẽn kõt kàj bê memã arẽ gẽ me kuma. Gora 'ãno dja. Dja me kute mar prãm jabej ga memã arẽ. Nhym bep djãm me kute mar prãm kêt jabej ga kam ga mã akubyn mekmã arẽ.

Gora Metĩndjwÿnh kabẽno me ngrẽk. Dja me'õ kute Metĩndjwÿnh mar kêt jabej ga kum Metĩndjwÿnh kabẽn jarẽ gẽ Metĩndjwÿnh kute katàt kabẽn jadjwÿrkõt amim kuman 'ÿr amijo akẽx.

Gora me axwe nêje me akre. Dja me axwe jabej ga memã akabẽn 'õ jarẽ gẽ me axwe kêt.

Gora memã tÿx jadjà. Dja me'õ kute Jeju mar rerek jabej ga kum tÿx jadjà gẽ 'ã ngrà tÿx.

Dja ga ã me 'ãno adjãmo anen kanga kêt mex ne akrãnmã memã Metĩndjwÿnh kabẽn'ã ajarẽ.

³ Dja ĩ me kute memã mÿjja kupa'ã arẽn djwÿnh bõx ne kam Metĩndjwÿnh kupa'ã ar memã arẽnho ba. Nhym mã me mÿjja punu mar prãm ne. Nhym te Jeju nhõ me jao ba djwÿnh te katàt memã arẽ nhym me mar prãm kêtumrẽx ne. Ne kam me kute kupa'ã memã arẽnho

bajabit ma ne amim me punubito atom nhym me kumex ne kam atemã memã kabên punu jarê. Me kute me kabên punu mar prãmkam ne me me kabên punubit ma. ⁴ Nãm me Metĩndjwýnh kute katàt kabên jarênhja mar prãm kêtikumrêx ne jãm kubê krã. Ne kam me tũmre'ã ujarênh kajgobit mar prãm ne.

⁵ Nhym bep ga. Ga dja ga mýjja kunĩkam ano tỳx ne katàt o tẽ. Djãm me te ajo ajkẽ ga tu ate akrãn ar amijo aba rã'ãn mã kam amirĩt ne. Gora adjàpênh 'ãno dja. Mýj adjàpênh gêdja ga 'ãno dja? Ije kum me kute Jeju mar kêtjamã kukràdjã ny'ã adjujarênh gêdja ga 'ãno dja. Dja ga mã kam apê, prĩne memã Metĩndjwýnh kabêno amirĩt ne katàt memã mýjja jarênh mexkumrêx.

⁶ Ë, arým me kute ibĩn 'ỳr. Arým itẽm 'ỳr. Arým ne itẽm djã ijo rãm ne jao tẽ. Ityk'ã, me kute ijo Metĩndjwýnh nhõ mry ne ibĩn ba ityk'ã ne ba arým itẽm 'ỳr jarê. Arým ne ba amikam kô krãn mexo tẽn kam amã itẽm djã jarê. Arým ne ityk djã ijo rãm ne jao tẽ.

⁷ Nã bãm Jejumã idjãpênhõ mrãmri ne me kute me prõt tỳxmã mýjja janhõr nhym me kumrêx 'ỳr mrãnh ne bõx ne kute amýnhja pyrãk. Nã bãm ã amikam itỳxo anen Jejumã idjãpênhkõt ajbit ma. Nã bãm ã Jejumã idjãpênh anen kam arým o ino rer djã'ỳr arým ibõx tẽ. Nã bãm ã 'itỳx anen amijo tẽn aminhinomã amimẽn arým itẽmmã. Nã bãm ije Jeju kanga kêt ne katàt memã mýjja jarênh arým itẽmmã.

⁸ Nhym kam Bẽnjadjwỳr Jeju kute katàt memã o pãnh djwýnhja tãm dja imã o pãnh. Dja katàt imã o pãnh mextire. Arým ne ikutêp kudji. Dja imã,

—Akmere, amrẽ tẽn amim aby. Ba arým amã ajaxwe kêt jarê ga arým imã amexkumrêx. Ne kam on amim aby, ane. Kute memã o pãnh nhõ akatikam dja imã kungã. Djãm

bajbit dja imã kungã? Kati, me kute kam amakja, me kum kinhja kunĩmã gêdja kungã, me kunĩmã o pãnh ne.

Kurê djwýnh amiwýr o bôx nhym ate kuka kônh dja.

⁹ Akmere, gora amrê amibêx ne on iwýr bôx. ¹⁰ Nhym Demaj. Demaj ne kum me kâtãm kukràdjã punujabit kĩnh, me kute Metĩndjwýnhho kurê djwýnh kukràdjã punu jabit ne kum kĩnh ne ar o ban arým ikangan imã iren mã tẽ, pykabê Texarônika'ýr tẽ. Nhym Krexëxi arým pykabê Garaxa'ýr tẽ. Nhym Xitu pykabê Damaxa'ýr tẽ. ¹¹ Rukabit ne ikuri dja. Maku dja ga aprôn amrê iwýr o tẽ. Nãm ikôt àpênh mexkumrêx. Tãm gêdja ga amrê o tẽ. ¹² Xikiku ne ba pykabê Epexu'ýr ano.

¹³ Ë, iwýr atêmkam dja ga amrê imã inhinôkà rytiwão tẽ. Wãnh ne ba gu bakamybê Kapukam kum inhire, krĩraxbê Krôwadjikam ne ba kum inhire. Gora amrê imã o tẽ. Pi'òk no'òk ngriwãmẽ no'òk raxwãmẽ amrê imã o tẽ. Pi'òk no'òktiwã ne ba imã kĩnhĩ. Gora aman amrê imã abyn o tẽ.

¹⁴ Ë, Arexãri kute ngôn nhipêx djwýnhja ne prĩne ijo ajkê. Metĩndjwýnh ta dja kum axweo pãnh. ¹⁵ Gadjwý dja ga aminêje tãwã pumũ. Nãm kabêno ar ijapa ne. Nãm kabêno ar ijapa: ba te kum ikabên mex jarê ne te akre nhym mã kabêno ar ijapan kam prĩne kabêno ijo ajkê. Kam ne ba amã,

—Gora aminêje tãwã pumũ, ane. Kam ne ba amã ane.

¹⁶ Me kute amiwýr ijo bôx kutewakam nhýnh ne inhôbikwa 'ò ikuri dja? Me kute amiwýr ijo bôx ne we ijaxwe jabej ikukjêro ýr kutewakam? Ba we ijaxweo ije amiptâr kadjy nàràmm me kute bit ibĩnmã amiwýr ijo bôx ne we ijaxwe jabej ikukjêro nhý. Nhym nhýnh ne inhôbikwa 'ò ikuri dja? Kati, nãm ar kunĩ ikangan mã prôt ne, mã ipymaje prôt ne. Gora gê inhôbikwa ipymaje prôtwã gora

gê Metĩndjwỳnh arkum o pãnh kêt ne arkam ujakrãnh no kati, arkam ukapřĩ.

¹⁷ Nã, me ne me ipymaje prõt ne. Nhy m bep kati, Bẽnjadjwỳr ne ikõt djan imã tỳx jadjà ba tu kanàrrãm kàj bê memã Metĩndjwỳnh jarẽ, prĩne kunĩ'ã ajarẽ nhy m me bajtem kunĩ arỳm kuma. Djãm me kute ikukjêrkam uma ngri got. Nãm me kubê rop pràbê uma:kumrêx. Nhy m bep Metĩndjwỳnhbit ne mebê ipytà.

¹⁸ Nhỳnh ne mỳjja punu 'õ ne kute ijo bikênhmã? Kati, Metĩndjwỳnh ta gêdja inêje jãm mỳjja punu dji. Metĩndjwỳnh ta ne kute ipytàr ta gêdja ipytàn ijo tẽn õ pykakam ijo bôx, môr djãmã ijo bôx ba kam kôt imexkumrêx ne ar iba. Gora gê me kunĩ Metĩndjwỳnhmã kàjmã rax jarẽ. Me kunĩ dja me kàjmã kum rax jarênhõ tẽ. O tẽn rã'ã rã'ã rã'ã ne. Gora gê me mrãmri o anhỳro tẽ.

¹⁹ Dja ga Prixiramẽ Akwire arkum ijarẽ, ne ajte Nex-ipôrmẽ prômẽ kramẽ arkum ijarẽ, ar kupãnh tã arkum ijarẽ. ²⁰ Ë, Eraxu ne krĩraxbê Kôritukam arek dja. Nhy m Krôpimu kanê, pykabê Miretukam kanê ba kam kum inhiren amrê tẽ.

Amrê amibêx ne na tỳm djwỳnhrãm iwỳr bôx.

²¹ Juburmẽ Prudêximẽ Rinumẽ Kraôdjãmẽ me kute Jejukôt abeno kamy kunĩ ne me wãm amã amijarẽ. ²² Gê Bẽnjadjwỳr Jeju prĩne ajo ba nhy m Metĩndjwỳnhdjwỳ ukapřĩkôt prĩne me akunĩo djuw mex. Tã ne ja.

Metĩndjwỳnh Kute Memã Kabẽ Ny Jarẽnh
New Testament in Kayapó (BR:txu:Kayapó)

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kayapó

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

